

光緒江西通志

江西通志卷一百四十二

列傳九 袁州府

漢

陳重字景公宜春人少與鄱陽雷義爲友俱學魯詩顏氏春秋郡太守張雲舉重孝廉重以讓義雲不聽義明年舉孝廉重與俱在郎署郎負息錢數十萬貫責主日至重密以錢代還終不言惠又同舍郎有告歸甯者誤持鄰舍郎綈去主疑重所取重不自申說市綈償之後甯喪者歸以綈還主其事乃顯重與義後拜尙書郎義黜退重亦以事免復舉茂才除細陽令政有異化拜侍御史

後漢書 白志原案人物志陳重與雷義後皆不仕同隱居雞足山卒合葬今其地

名陳
雷里

晉

袁京宜春人不樂仕進隱居府城東北五里山時人因

名袁山郡守為立高士坊

林志 謹案林有席平園雜

據漢書袁安傳末附二子長曰京為蜀郡太守傳五世至閭桓帝末散髮絕世謂京為閭會祖在漢順帝之前安得以為晉人又籍汝陽官蜀郡何由至袁為高士郡守何由為之立坊表墓又謂通志既以京為晉人故大

小袁山亦稱晉高士袁京隱居此山卒葬其側山因以

袁名而府志袁山條尚稱漢高士袁京隱居於此惟人

物傳則與通志同又通志分宜袁嶺條稱舊傳東漢袁

閭隱居其下閭為京曾孫既屬東漢尤不得以京為晉

人是必

有誤

唐 南唐村

彭雲構宜春人自幼力學通陰陽圖緯隱居不求仕元

宗遣使以蒲輪徵之至再始行命之官辭歸孫伉自有

傳

林志

劉松字稽美宜春人累舉不第集郡人天寶己後詩四

百七十篇爲宜陽集六卷

唐書藝文志

彭蟾字東瞻好學不仕以處士稱重修唐韻及著鳳池

本草廟堂龜鑑共一百二十卷有詩十一首見宜陽集

縣志

韋無強宜春人隱居十五年不出戶郡守董禎欲表不

求聞達科固辭不就爲立逍遙坊表之

府志

彭伉宜春人貞元間進士授石泉縣令歷官岳州錄事

參軍有政聲

府志

鄭史字惟直宜春人開成進士爲易學博士積官永州

刺史有賦百篇又有詩十二首見宜陽集二子啟谷人

志

盧肇字子發宜春人兒時見宜春令盧萼奇之曰子異
日當有聞肇於是益力於學舉會昌三年鄉試入京獻
書侍郎王起時起知貢舉遂擢進士第一授潼關防禦
判官初肇之未舉也李德裕謫州長史殊遇肇後肇應
進士德裕復入相見肇至曰吾喜爲金榜得狀元矣遂
魁天下雖受德裕知絕無倚附久之使相盧商太尉裴
休左僕射盧僴求先後奏辟從事稍遷著作郎除倉部
員外郎充集賢院學士持節歙州諸軍事肇於是觀日
月之運察盈虛之理爲海潮賦成上之詔褒諭宣付史
館移鎮宣池二州遷吉州刺史卒所著有文標集子文
秀咸通中進士爲長安令有聲官至宏文館學士
諱章
易重字鼎臣宜春人會昌中張濱榜進士第二會有詔

覆試黜濱以重代之官至大理評事著文千篇

安志

李潛字德隱宜春人會昌中舉進士其謝座主王起詩有文學宗師似秤平無私三用佐貞明之句蓋起三知

貢舉也

唐詩紀事

黃頗字無頗宜春人韓愈爲州刺史頗師之爲文章與

盧肇齊名素不相下頗鄉試高等而肇狀元及第會昌

末頗亦舉進士爲監察御史有文千篇行於世

唐摭言

袁皓字退山宜春人博學工著述咸通進士任撫吉二

州刺史有治聲龍紀元年自集賢殿圖書使出采訪圖

書著碧池書三十卷自稱碧池處士

林志

鄭谷字守愚穎悟絕倫七歲能詩司空圖嘗與其父史同院見谷奇之拊其背曰當爲一代風騷主光啟三年

進士始爲京兆府鄆縣尉後爲拾遺補闕乾甯四年以都官郎中退居於仰山東莊之書堂以卒谷詩清婉明白爲薛能李頻所稱僧齊己有詩名詠早梅云前邨深雪裏昨夜數枝開谷曰數枝非早也未若一枝齊己不覺設拜士林呼爲一字師谷始登第與許棠任瀉張蠙李栖遠等十人同有聲謂之十哲而谷尤以吟詠顯有詩四百篇嘗從僖宗登三峯朝謁之暇寓止雲臺道舍自編其集曰雲臺編宜陽集各三卷其鷓鴣詩尤工世號鄭鷓鴣

人物志

唐廩萍鄉人乾甯進士官至秘書正字集貞觀以前文

章爲貞觀新書三十卷

全唐詩小序舊有宋嘉定間

白志舊案袁州志載唐人宋迪

以下或有詩見於宜陽集及登科年甲互見於題名記者凡五十有七人今不具錄

盧邈肇族子唐末預湖南計偕舉進士獻迴文詩三百

首官至秘書省正字

人物志

彭世昌字襲之宜春人謹身修行以名節自持楊行密據淮楚召爲長史未幾謝病歸有豪猾子數百爲羣劫之曰吾徒遭亂世未有所託今德足而智有餘莫若君請隸焉世昌正色叱曰梁汴之間真人出矣不知命數而逞無窮之欲智者不爲也敢辭復請又辭三請之不從設棘簣繫其上而焚之諸孫仕宦有聲

人物志

宋齊邱字子嵩萬載人父訥攝鎮南軍節度使推官守大理評事齊邱少孤好學善屬文兼習機變權詐之術豫章亂遂隨眾東下時李昇刺金陵延四方之士往依焉甚被親禮昇欲進用之爲徐溫所惡以爲殿直軍判

官溫卒擢拜左司員外郎累遷諫議大夫兵部侍郎參
議機密尋授洪州節度使璵襲位復召爲相俄乞致仕
出爲浙西節度使表乞歸九華賜號九華先生封青陽

公所著化書理訓各十卷

南唐書

王穀字虛中宜春人南唐初登第長於樂府有鴻門詞

苦熱行玉樹曲膾炙人口

林志謹案辛文房唐才子傳穀自號臨沂子中乾甯五

年羊紹素榜進士歷國子博士以郎官致仕有詩三卷及前代忠臣臨老不變圖一卷觀光集一卷則非南唐

人也

李徵古萬載人篤學有詞藻登第後以樞密副使除本
州刺史離都日李主賜以內庫酒入宜春界每經一邨
落必召耆舊親知藉地飲酒盡歡而去到郡靜理壁立
凜不可干嘗以私財百萬代鄉人輸稅尋以事賜死

人物

志

盧絳字晉卿宜春人自言唐中書舍人肇之後讀書略
通大旨喜論當世利病舉進士不中往來金陵丹陽間
久之乃上書論事陳喬異之用爲沿江巡檢募亡命習
水戰宋師來討以絳爲淩波都虞候守秦淮水柵屢勝
諸將忌其能說後主遣出授潤州節度使劉澄出送降
款絳率所部走保宣州金陵陷絳獨不降謀南據閩中
過歙州怒刺史龔慎儀不出迎殺之而行太祖使絳弟
襲招之至京師授冀州團練使遇慎儀兄子顯於朝曰
是殺我叔父者執至殿陛訴冤詔屬吏樞密使曹彬言
其才略可用願宥其死使自效太祖曰是貌類侯霸榮
何可留也斬於西市

南唐書

宋

劉式字叔度新喻人明春秋公穀之學南唐末舉進士
是時張洎主文衡獨放式一人太祖平江南羈旅入京
厯鴻臚大理丞出監通州和豐倉入判三司都磨勘司
時財賦充斥無所明辨式條其闕漏創主轄支收司奸
吏畏服洎化中齋別往論三韓轉太常博士賜玉書法
帖十六軸終刑部郎官

人物志 白志 舊家實字記宋初未置臨江軍時新喻尚屬袁

劉應入袁州人物

易言字應之宜春人少任俠有口辯真宗朝蠻寇宜州
邊帥不能制募辯士往說之言應召單騎往酋長迎待
甚恭竟歸順休兵真宗嘉之賜以官後元昊擾邊近臣
多薦言可任上見其老不欲遣行令赴流內銓任樞府

司戶參軍

林志

李奇字子正宜春人任職方員外郎性慷慨不事產業
悉以祖產分兄弟仍戒子孫不得追取既卒族人端以
詩哭之有祖來產業分兄弟身後詩書遺子孫之句

人志

易著明字晦之宜春人博學精於聲律累被鄉薦時人
爲之語曰宜春易著明擲地作金聲與石曼卿爲詩友
天禧閒賜三班奉職終於左班殿直

人物志

李衢字叔達宜春人唐西平王晟裔孫大中祥符登第
官至屯田員外郎嘗倅筠陽寬慈不擾後以子貴贈特
進

人物志

夏侯錫分宜人天禧進士衡州司理參軍稍遷吉州判

官厯知南康興化軍皆以善政聞治平中轉朝奉郎都官屯田郎中致仕子公績元豐進士

林志

孫億字延齡分宜人進士知吉州永新縣民歲市緞六萬餘匹主外計者收帑錢以供他費給鹽以償緡直億發其弊吉租歲收四十萬斛漕臣意在聚斂戒庾吏收什二以充羨餘億拒臺命出納一用倉式卒余靖爲志

墓

林志

李士安字永和宜春人以特奏同學究出身爲人不妄喜怒累任州牧後請老得養生之術視聽不衰年九十

七卒

人物志

李士燮字和甫初名梁登慶厯六年第爲人剛正不撓嘗知郴州吏民畏愛未嘗見其笑容仕至職方郎中

志

李觀士安從子慶厯二年試南宮賦偶失韻主司嘉其策特奏名登第時方弱冠知清江縣事熙甯初爲大官令尋言役法不便出倅括蒼元祐初監江州太平興國觀司馬溫公爲相以書召觀比至京溫公已薨除虔州不就請監南嶽廟以歸觀少好神仙嘗遇吳人劉海蟾

以得道自任而排斥釋氏卒年七十三

宋人物志未詳考如前易言傳

第卽知縣事者林志所言官制多未詳考如前易言傳赴流內銓任樞府司戶參軍樞府樞密院也與中書稱兩府其官屬至監門箠庫而止安得有司戶參軍考失考此類至多糾不勝糾特發其凡於此

朱彥博字元施萍鄉人嘉祐進士通判潁州秩滿上神

宗皇帝書極言當世利害召對稱旨遷廣西江西運判

厯知虔虢解三州及湖北憲副所至有聲

人物志

彭持字知權分宜人少喜學西漢文爲諸生時知軍州事張容稀簡接士求見者先令詩賦方得通士無敢進者持奮曰是謂秦無人矣因入謁容令作日新之謂盛德賦藏器待用詩皆立就容大稱賞貢入太學與臨江孔武仲齊名擢進士甲科元豐閒累遷司農丞出爲監司號霹靂手終江西提舉

林志

高漸字善時萍鄉人熙甯進士甯鄉尉論新法有行而未便便而未盡善者凡十策調廣州錄事參軍建中靖國初再疏請正元祐元符二后君妾之分崇甯初編管撫州列名黨碑大觀二年預八寶赦與起居舍人黃庭

堅等同時復官

人物志

歐陽中立袁州人初試部郎上書言新法不便以司馬

光門人坐廢遂不復起卒弟子私謚節孝先生

人物志

曹傳宜春人元符三年與弟藻子遷同登進士人名其堂曰三桂傳官至朝請郎知常州藻宣教郎知益陽縣遷通直郎知郴州兄子邁崇甯進士積官中奉大夫廣西運判直祕閣兼權安撫使

人物志

彭俞字濟川宜春人少隱集雲峯學邃於易自號連山

子紹聖進士知溧陽縣理冤獄甚多監司連薦之稍遷

至朝散郎所著有循吏龜鑑十二卷文集二百卷

林志

湯夢觀萍鄉人崇甯進士知循州時蠻寇劫掠旁郡恒相戒不犯夢觀境事聞朝廷嘉之除六路坑冶鑄錢提

點

人物志

羅長康字偉正宜春人政和進士厯官寺丞出知永州

迎其父以養因名州署之後堂曰戲綵

人物志

沈莊可分宜人宣和進士知錢塘縣嗜菊庭植嘗數百本晚年退居益放情於菊後以九月九日死朱文公哭之詩有正當地下修文日恰值人閒落帽天之句

人物志

白志舊案文公哭沈莊可詩本集不載

李格字承之萍鄉人幼孤力學雖執爨手不釋卷既長通五經目重瞳觀書五行俱下元符進士許翰薦於朝以作詩諷新法被論下獄竟得直歷職州縣同官多憚之

人物志

郊元鼎字元之宜春人學問行誼為鄉里所推重數舉不第無嗣郡中達官出其門者每歲拜其墓

林志

蕭杞萬載人宣和進士學邃於易精大衍之數歷官通

判廣州軍州事有治聲稍遷至市舶提舉

人物志

鄭銓字應權宜春人學通六經宜和閒兩貢上舍不偶棄歸學者踵門日眾金人犯江西銓上書知州事王仲疑言時事責其守城著排姦黨說極論崇甯人才之弊

人物志

張琯字子律宜春人少從學邴元鼎熟於典故厯官州縣以才謂稱立朝靖重不苟守嘉興卒平居不事生產仕至二千石喪歸貧無廬其清約如此然勇於爲義周人之急未嘗以匱乏辭子嗣古紹熙進士厯起居舍人官至中奉大夫直龍圖閣致仕嗣古有文名慶元以後凡郡邑紀述文翰多出其手

人物志

羅尙友字明善萍鄉人少負俊才登進士第授武昌軍

節度推官時中丞李常爲帥每燕集必召尙友凡樂語詩詞皆卽席成因目爲席上才子

人物志

黃嘉萍鄉人靖康初太學生從陳東伏闕上書請誅蔡京及用李綱退詣開封責府尹王時雍曰初以尹獻熙豐十事將喜有爲乃今奸邪如此時雍唯唯執政者見嘉輩論事曰諸公日止食國家二升米耳吾徒有愧多矣後終廉州司法參軍

林志

歐陽椿字永年分宜人袞公修之族紹興進士主瑞金簿稍遷至道州判官改判臨江軍轉永州教授未老致仕蕭散林泉號宜春老人有自修集行於世

林志

譚綺字德新萍鄉人少嘗學問稍長勇健過倫應募從康王使河北授承事郎及卽位綺掌飛龍內殿一日聞

加十三資官至國練使

府志

潘修字文叔萍鄉人年十七領鄉舉入京獻書宰相張浚隆興初以累舉特奏名陳時務六事從參廣西軍事討平洞賊李楫又上言二廣通販鹽法事宜與當國者異竟格其賞不行致仕

人物志

趙善堅字德固宋宗室家宜春乾道進士簽書婺州判官朱文公爲浙東常平使器之歲旱賑卹有條所全活甚多歷官皆有治聲

林志

孟浩字養直宜春人乾道進士知武甯有聲王藺自豫章召參大政力薦之朝選國子監丞出知湖州與貴幸忤罷歸起爲涇州路轉運判官尋以直祕閣提舉四川常平狷廉不妄取與強毅精敏洞見事情常以州判官

攝臨江軍奉給一無所受

林志

文彥直字益之萍鄉人性好學雖避寇山中猶誦讀不輟紹興初以恩補漢陽軍事判官終淮陽軍節度推官

林志

夏執中宜春人成恭皇后弟補承信郎閤門祇候遷古武郎閤門宣贊舍人累遷奉國軍節度使加少保初執中與其微時妻至京宮人諷使出之擇配貴族執中弗爲動他日后親爲言執中誦宋宏事以對后不能奪旣貴始從師學作大字頗工復善騎射高宗行慶壽禮近戚爭獻珍瓊執中獨大書一人有慶萬壽無疆以獻嘗爲館伴副使連射皆中金人駭服孝宗聞其才將召用之辭不就

宋史

宋斌袁州人少師朱子慕學甚篤至老不移臨安尹趙

與權延之事以父行奏乞用旌禮布衣故事不報

浙江通志

胡安之字叔器萍鄉人受業朱子經史疑義多所著述

郡守程許葺南軒書院聘安之主席學者稱自齋先生

林志

孫汲字公善分宜人寄籍臨江應舉授朝散郎監司知

其才檄權吉州吉素號煩劇汲居不越月境內稱治人

志

易充字正翁分宜人幼聰敏拔羣博通易書詩號三經

處士教授鄉閭遠近從學者甚眾所著有中洲文集

林志

李公凱字仲容宜春人撰毛詩句解二十卷自淳熙後

說詩者率遵朱子之傳去序言經仲容獨取呂氏之書

隰括以淑後進

隰書亭集

晏父字明粲宜春人風度秀整主趙崇灃家後崇灃逮

繫父自請詣獄俱以瘐死

人物志

趙若燭字竹逸景定進士子嗣誠博通經史宋亡不仕

及其門者甚眾著有尙書毛詩箋注

府志

元

趙榮字榮甫分宜人由吏學發身仕至朝請大夫萍鄉

州知州致仕子彥文以賢才徵知閩縣事

人物志

歐陽元字原功號圭齋其先分宜人祖遷瀏陽元魁湖

廣鄉貢進士及第歷官翰林學士承旨封楚國公贈大

司徒文章道德師表當世所著有圭齋集

人物志

彭應雷字震卿分宜人延祐間舉儒士授南甯路判官

稍遷蘭谿州同知有清白聲擢知象州引年致仕

林志

夏鎮字定遠宜春人以春秋登至治進士授茶陵州判官終奉訓大夫學行端飭爲文章簡嚴有法度學者多

宗之

林志

哈雅

原作海牙

字伯源高昌人祖爲袁州稅務大使遂爲宜

春人哈雅登至正進士授承事郎進賢縣達魯噶齊

達魯花赤

興革利害茂著廉勤節公宇新學舍爲士民仰戴

善屬文

人物志

彭繼凱分宜人至正末歐普祥陷袁州繼凱募義勇起豐樂鄉迎戰大破之會安福義士袁明東等亦引兵來賊退走州遂反正乃下令禁殺掠修城池繕甲兵弔死恤孤民賴以安迎舊守寶童歸嫉其功令刺客殺之

明一

統志

黃盅字子中萬載人受學於臨川吳澂澂以子妻之至正丁卯舉於鄉授龍泉縣學教諭澂嘗題其書堂曰大

本

林志

夏以忠字尙之宜春人宋信王夏協旅孫以春秋試大都路流寓科第二授翰林國史院編修官調國子助教遷太史院都事洪武元年明師克燕悉官其知名士以忠獨以老病辭詔許歸會遣使搜訪元史強之如江廣以忠辭不得命行至番禺卒太史金華蘇伯衡著文哀之

之

林志

明

劉迪簡宜春人學邃於易詩春秋吳元年徵入京授尙

賓館副使陳時務五十條及進皇王大學通旨奉使交
趾至南甯道卒所著有尙賓集孫衢舉於鄉揚州府同
知有政聲

人物志

劉仲質字文質分宜人洪武初爲宜春訓導被薦入京
擢翰林典籍奉命校正春秋本末十五年拜禮部尙書
帝以天下郡縣並建孔子廟而祀止京師典禮未備命
仲質議之仲質乃與儒臣奏定釋奠禮儀頒行天下學
校每歲春秋仲月通祀孔子如儀時國子學新成帝將
行釋菜侍臣有言孔子雖聖人臣也禮宜一奠再拜帝
曰孔子明道德以教後世其可以職位論邪今朕有天
下敬禮百神于先師禮宜加尊崇乃命仲質詳議仲質
請帝服皮弁執圭詣先師位前再拜獻爵又再拜退易

服乃詣彝倫堂命講庶典禮隆重稱陛下之意詔曰可
又立學規十二條合欽定九條頒賜師生是年冬改華
蓋殿大學士帝親製誥文賜之坐事貶御史後以年老
致仕爲人厚重篤實博通經史文體典確不尙浮藻常
當帝意焉

列卿錄

劉澤民字朝佐宜春人邃於經術能詞章洪武元年以
賢才舉授縉雲知縣有政聲民稱劉父升嘉興府同知

林志

歐陽貞字元春分宜人從學士揭傒斯鄉進士夏鎮學
工古文元季不仕洪武初以易經魁江西鄉試授考城
主簿改扶溝以老歸所著有周易問辨三十卷史提鉤
七十卷餘學初集龍江叢稿東齋寓錄貧樂集自號石

戶農

人物志

謹案袁州府志貞父自強字南翁元延祐再試鄉舉不第卽息志進取以著述教授自任

於故宅建樓曰意山揭俟斯爲之記

簡迪字居易萍鄉人洪武初以明經舉充儒學訓導太
守朱守仁以學行獨高薦升本府教授至京試吏部優
等除監察御史遇事敢言明年以疾致仕自號鄉溪老

人

人物志

袁天啟分宜人元末歐祥

一統志作歐普祥

陷袁州天啟集民

兵禦之不克祥怒屠其鄉天啟匿江灣柳下獲免洪武

初舉儒士授本縣儒學訓導卒

安志

龍道字克溫宜春人襲職居南京少警敏博通經史遨
遊四方與邱仲深羅彝正陳公甫爲布衣交重然諾尙
風義朋游有急揮金如土苴江湖閒聲稱藉甚曰過金

陵不識龍克溫猶徒行也著作甚富寓荆南築室海子山有鴻泥集在金陵有燕居集自號半閒居士東江顧清作半閒居士傳子覲字致仁宏治進士官副使歸入茗溪詩社與劉南垣齊名

列朝詩傳 謹案龍覲明史附見劉麟傳

龍儀字希文萬載人進士授永壽知縣廉潔嚴明人懷其德累遷刑部郎調爲黃州同知解散賊黨境賴以安置學田贍諸生膏火升山東參政著有龍江別集若干

卷

陝西通志

黃子澄名湜以字行分宜人洪武十八年會試第一由編修進修撰伴讀東宮累官太常寺卿惠帝卽位命子澄兼翰林學士與齊泰同參國政廢周王岷王幽代王囚齊王湘王自焚死燕師起王誓將吏曰陷害諸王泰

子澄所爲也兩人本書生兵事非所長耿炳文敗薦李
景隆代之益無能爲喪失數十萬子澄拊膺曰大事去
矣燕師漸南與泰同謫外密令募兵至蘇州與知府姚
善倡義勤王京城破欲與善航海乞兵善不可乃就嘉
興楊任謀舉事爲人告俱被執子澄至成祖親詰問之
抗辯不屈磔死族人無少長皆斬姍黨成邊一子變姓
名爲田經遇赦家湖廣咸甯正德中進士黃表其後云

國朝賜諡忠愍

明史

勝朝

殉節

諸臣

錄

白志

舊案

福

集載靖難初子澄攜四子及一孕妾逃崑山追捕急有
太守某者合其子隨父就逮而三子改姓田孕妾復生
子公死難後其子求其尸葬蘇之馬鞍嶺紀事於石
納墓中有費官欲奪其地訟之官遣司理某勘之至墓
所震雷挈碑石而出始知爲公墓司理具牲醴設奠貴
官媿而止今田氏代有顯者隆慶中妾之子孫始歸分
云宜

龍鍾字德剛萬載人年十九選入南宮曹國公李文忠
司成宋訥遇以國士薦知高皇帝召對稱旨命同隨春
坊官入直講悉民閒田里稼穡陳古今孝弟文學諸史
數年詔治水於泰州視軍遼東川雲所經利弊當興革
者悉以聞帝嘉其能特授浙江按察使歲浹饑俸贖悉
捐濟各郡以不避權貴爲忌者所中遷長洲知縣歸侍
養歲餘適晉府恭王薨世子幼起爲晉府左長史靖難
師起北平檄徵晉兵鍾泣固拒之文皇引兵至城下力
攻不克竟趨金陵入正大統械鍾下錦衣獄不屈死年
僅四十

人物志

黃伯奇分宜人姿性純篤好禮尙義洪武中以才行老
成舉授金華知府莅政嚴謹吏服其能

明一統志

嚴孟衡字衡中分宜人永樂進士授監察御史屢疏大
臣不法有司憚其風采升浙江副使莅任前一夕胥吏
不戒於火案牘燬在事皆資緣規避衡自引享受罰運
磚逾年有白其枉者赦復職時法網稍密衡悉心平反
一牘中理冤濫數十人屢遷至四川右布政使凡三年
卒於官

人物志

劉藎字迪誠萬載人永樂進士授給事中詔巡撫湖廣
表循良黜貪墨綽有風采以論事忤旨調通州判官尋
復爲給事中言愈切直謫嚴州府經歷卒

人物志

易節字時中萬載人永樂進士授行人歷禮部員外郎
宣德閒知成都府升貴州左布政使有惠政夷人化服
卒於官

明一統志

郭瑾字邦器萬載人永樂進士歷刑科都給事中特進
刑部右侍郎以論中官忤旨出知潯州府未幾復原官
轉左侍郎懇辭歸卒年八十三

人物志

李瓊字蘊素萬載人宣德舉人任高安縣訓導歷詹事
府校書進汀州知府首建學校決訟如神吏無侵漁時
上杭寇至躬詣撫降民安之

人物志

羅紳字尙訓宜春人宣德末年貢生先任鹽亭知縣復
任廣東石康縣流賊陷城父子三人死節立忠孝祠

人物志

袁魯訓字宗道宜春人皓之裔成化進士授東陽令蒲
鞭不事又補蒙城擢行人司正時汪直輩專橫魯訓雅
志解組適同年羅一峯以論李賢見謫遂歎曰直道不

容如此哉遂棄官歸慕五柳之風植六柳以自娛號六

柳居士

人物志

袁慶祥宜春人以貢入太學待選吏部上疏言賞賜過
濫所出不償所入又論刑部尙書董方身不執法而折
辱屬官以自厲又言正本澄源宜從學校胷監親民之
職宜慎簡縣令黜衰老以息貪汙宜用夏埏張元禎高
明羅倫以從士望書奏詔杖之東華門

人物志
舊案袁慶祥林

志失載時等都有同姓名者成化
朝亦入太學上疏被杖別有傳

蕭義字宜之宜春人成化進士授吏部稽勳主事卒義
操履端方問學典寶文辭雅暢袁士多師之

人物志

歐陽汶字伯魯分宜人以經明行修舉授開封府學訓
導改永康不受士贄師範嚴整進國子學錄嘗疏論時

事遷周府長史改伊府致仕

林志

郭紳字廷章宜春人成化進士授甯海知縣侍講方孝

孺縣人也事淹國禁紳至首刻方正學集創祠祀之擢

監察御史厯官南京刑部右侍郎卒紳器宇凝重雖厯

崇顯而居鄉待人寬厚簡樸有長者風子敘正德進士

厯貴州參議

人物志
正人祠記

謹案明史姜昂傳鄧川州立三

龍政宜春縣志紳嘗巡按雲南升貴州參政

福建布政使太僕寺卿前志皆未載今補

高琬字德資宜春人成化進士厯知松陽上海二縣治

行第一擢南御史厯官浙江布政使撫治郎陽河南襄

漢盜起琬同都御史彭澤討平之璽書獎勵謝病歸卒

年八十有五

安志

張鳳字應時宜春人成化進士授江浦知縣厯長樂內

黃皆有政聲累升廣西參政時土酋爲亂至則斬其渠魁撫循其眾地方以甯轉南京太僕少卿尋升南京僉都御史提督操江改巡撫蘇松三河盜起齊魯騷繹河運不甯進右副都御史巡撫山東兼理河道事平致仕

卒於家

林志

龍士通字允升萬載舉人任長汀知縣長汀地饒而俗黠士通冰檠自矢供具日止腐菜家僮三人見其清苦遂逸其二高御史葑按閩風力嚴峻特薦之遷彰德府

同知

府志

李香字汝蘭分宜人正德進士初授工部主事抽分徐州轉刑部尋擢廣東兵備綏靖蠻寇厯升四川巡撫大理正卿引疾致仕歸清恬端莊宦轍所經靡不服其公

廉居家敦尚孝友捐橐贍族修葺學宮子慶餘亦篤孝

友

人物志

彭鳳字夢瀑分宜人嘉靖進士選庶吉士授編修冊封岷藩卻諸餽遺甲辰會試充同考官同里時相欲徇所私鳳峻拒不納撒棘後有撫拾科場之弊者波及鳳竟用罷歸家居寓情山水以著述爲事敦行孝弟嘗引呂氏藍田約參酌成篇西岡彭氏家法遂冠一邑時相敗鳳冤始白所著有逸休堂稿

徐學詩逸休堂稟序

易鸞字和鳴分宜人五歲能詩正德十五年奉文建黃太常忠臣祠鸞願以己地立祠助修嘉靖癸未進士授和州知州下車手較權量使民盡一時有易公稱斗之號升刑部郎子宏器嘉靖丙午鄉試第一家居清淡博

古善文未仕卒

人物志

何爾字邦美宜春人嘉靖進士授舒城令擢兵部主事改御史巡按蘇松一意激揚微行出訪大吏憚其丰采入掌計典公平不阿林居十載執政復以書起辭曰吾守吾舊不能降心以從人也郡中有大利病侃侃陳說里人德之

府志

楊以誠字明夫宜春人嘉靖進士授行人擢御史巡按陝西茶馬嚴絕吏弊復巡按廣東彈劾不職賊吏望風解綬者十餘人以遭謗歸里

府志

朱良佐字守忠萬載人嘉靖進士授淮安推官擢兵科厯戶科都給事彈劾不避權貴如正中官通海運肅關監停翫作皆極言之升大理右少卿謝病歸

人物志

宋希堯字叔中分宜人萬厯進士時江陵不丁母憂鄒元標以進士特疏參劾希堯亦侃侃持論其子宜奔喪故爲所忌授刑部未幾稱病歸越歲出補工部營繕司

卒

人物志

簡繼芳字慶源萍鄉人負資異敏年十三與童子試邑令楊自治見而奇之稱爲崑山片玉遂補諸生家貧篤學萬厯進士厯官雲南副使所至稱廉謹以老告歸

府志

陳巽言字汝說宜春舉人教諭宜興升上杭知縣清敕端重不阿當路轉維摩知州告養生平孝友廉靜寡慾學以性命爲宗

府志

張璧字世良萬載人萬厯進士授南兵部主事厯武庫司郎中值營兵缺餉脫巾諫呼璧單騎禽首亂卒以鎮

定遷廣西僉事巡左江卻關門例數千金定交南黎莫
二氏構殺之亂轉右江參議改雲南參議分守金滄條
議罷大理采石省麗江額解金值歲餼斗米錢三百臺
司議以米代杖每就禁多斃壁歎曰吾甯違新法以一
官易多命下令悉除之全活三百餘人嗣謝病歸

人物志

趙錦分宜人安貧嗜學嫻於詩賦著有草堂集行世子
廉弱冠選貢授石埭令累遷惠州郡丞所至有善政事
親以孝聞撫從子如子好引進後學邑人稱爲東谷先
生年九十五卒

人物志

羅彝字性菴萍鄉人父喪廬墓三年注孝經萬歷初詣
京上書給賜深衣大帶與鄒南皋劉蘆蕭開明理學江

右皆仰宗焉

人物志

彭士遠字利見分宜人萬厯舉人初授廣西賓州知州移河池州州素患土孽士遠廉得其渠魁地方甯謐尋遷鳳陽同知以河功加俸

府志

彭自新字滌之萬載人萬厯進士授行人升刑部郎中出守四川重慶府升本省副使歷升雲南參政時雲龍逆酋段進忠謀襲奪官擁兵叛自新計誘禽殲渠散脅迤西以平遷本省按察使以疾致仕歸自新初爲大行卽抗疏請元子冠婚大典一時重其丰采

人物志

朱志字元遠宜春人少負才名以貢選入太學舉順天鄉試任瀏陽令子壻來省一飯卽令歸甫二月以不阿鑛璫棄官歸子六人俱以文學顯光裕光祺先後鄉薦光祺字資賢端謹嚴重遭郡多故祺條議戰守激揚忠

義上書潯督語極憤切後教授萬山中疾革正襟而卒

人物志

宋九儀字夔卿萬載人由恩選授建甯知縣尙文學課農桑禁女巫戒溺女廣倉儲歲凶捐俸積穀邑人曰宋公倉士民愛慕爲立生祠九儀取其本主以歸曰吾不務虛名也入覲力請終養事親以孝聞林居三十餘年吟咏自娛有和淵明六詠以見志年八十一終

人物志

袁軾字欽禮宜春人年十四失父下帷力學補博士弟子試輒高等入閤不遇毅然曰泉石可甘菽苟可嗜奚區區爲日課予以程朱之學與里中講鄉約訓民行學者稱爲東泉先生年七十有二以子業泗貴贈漳州府

知府

人物志

嚴堯日字用汲分宜舉人任泰和學博文水鄒元標倡會講學獨折節於嚴鄒起大僚招爲幕屬力辭復署汾西卒孫一晁順治鄉薦

府志

袁業泗字景源軾子萬厯進士知樂清縣改蘭谿丁父憂再補龍溪所至著循良績擢南京兵部主事進員外郎中特疏請撤湖口稅璫李道遂罷其權江上下千里稱便知漳州府漳故多盜業泗梳櫛綢繆俾無震擾士民親附歲饑發倉賑之又勸民出粟分遣諸吏乞糴潮陽諸鄰郡以濟不給全活數千人升福建副使念母年八十餘乞養家居崇禎改元召補廣西副使分守左江遷廣東參政分守嶺東平九連山賊地介惠潮兩郡多反側肇置連平州所部以甯徵爲南京鴻臚寺卿再疏

乞骸歸以疾卒子繼梓自有傳

人物志

吳三益字受元萍鄉人萬厯進士授大理評事由寺正出守邵武尋改徽州所至以敏練著聲晚年林居與修

郡乘

府志

張承詔字篤棐分宜人萬厯進士授蘇州推官遷禮部主事擢戶科轉工科都給事中果決敢言厯升南刑部左右侍郎署尙書以會審事忤旨閑住

人物志

彭大科字媿名分宜人萬厯舉人初知漢川縣縣有河名劉家陂者巨鎮也商賈絡繹歲額派商稅八百金協濟潞府癸丑河闕舟楫不通而稅仍歲徵陂民苦之大科力爲陳請得罷其稅撫按交薦調知廬江有惠政升北城兵馬司時逆璫魏忠賢用事大科獨守正不阿左

遷景東同知璫敗擢工部主事監督陵工以病請告人志

嚴雲京字志印分宜人萬厯鄉舉知平原縣以城守著績升兵馬指揮召對授御史巡按河南兼監軍時汴圍越月雲京疾趨受事促諸鎮左良玉劉澤清許定國等進兵援汴圍稍解未幾賊復合值霖雨彌月平地成川賊決河灌城城沒而汴圍獲解會上別遣監軍來代乃歸府志

袁一鳳字鳴岐宜春人萬厯進士初任工部主事升虞衡員外郎中曉暢吏事善治繁劇逆璫廉其能有意鉤致之一鳳不爲動守西安清介自持未幾遷浙江副使時海塘崩潰奉旨估費十五萬金一鳳身任其役用四

萬金而工成歷楚藩臬卒於官

人物志

鍾炘字叔憲分宜人天啟進士授中書歷禮科都給事中縝密不妄言嘗以袁賦浮重又遼餉加派煩多約諸紳在朝者疏請豁減卒以部議格未盡行識者恨焉累官左都御史以會審事秉筆忤旨革職回籍林居十餘

年卒

府志

黃希憲原名金貴字雙南分宜人天啟進士知順德縣擢御史巡按甘肅遷太僕少卿應天巡撫三吳漕白二糧累民已久希憲力爲請命海寇王尙忠蹂躪崇明各邨落希憲殲渠散脅吳淞悉平晉河道總督兼兵工二部侍郎乙酉江左姦黨誣以河工冒餉下詔獄會喪亂出亡遇盜殺於江上

人物志

喻子賢萬載人由舉人令廣東程鄉調增城下車數問疾苦民情悉達遇事立解戢蠹役無敢奸法催科革加耗俸自注簿民樂輸焉寇盜扳良多置不問諸自經服毒誣人者懲之風俗爲之一變至於管郡胥之害民抑中使之橫恣尤人所難以艱去民如失襁褓

廣東通志

袁一鼇字占梅宜春人由舉人授江山知縣調邵陽入爲南大理評事升刑部員外審決河南擢寶慶守吏民畏服喜獎拔士類以忤岷藩歸卒

府志

朱允恭字君培分宜人由鄉舉授望江知縣臺司交薦以循良高等遷守海州焦勞拮据凋殘稍有起色忤當事去任允恭早失父而貧事母純孝撫弟至老不衰凡所入不以自私遇歲奇荒雖日不再食猶節敝衣鬻於

市以周親族之貧其好義如此

人物志

白志舊案府

母以孝聞

鄰人鬻妻贖母貸以貲完其夫婦不詳何縣

人謹案安志孝義傳有萬載郭稼龍以仁張經宜春

易直萍鄉李魁春李

茂林並附錄於此

潘士聞宜春人萬厯進士天啟二年知清豐縣釐革弊

政羣吏肅然持操廉潔纖芥無取捐俸百餘金置田歲

徵租貯之學舍以賑貧寒擢刑科給事中

直隸通志

袁繼咸字季通宜春人天啟進士授行人擢御史厯山

西提學僉事湖廣參議分守武昌禽賊首呂瘦子擊退

老回回革裏眼等七大部築黃岡城六千餘丈擢右僉

都御史撫治鄖陽未一年襄陽陷被逮戍貴州廷臣交

薦起故官總理河北屯政未赴賊偏江西廷議設重臣

總督江西湖廣應天安慶軍務擢繼咸兵部右侍郎兼

右僉都御史以行賊已陷武昌左良玉擁兵東下繼咸遇於蕪湖激以忠義良玉卽還恢復武昌廷議呂大器來代命繼咸仍督屯政大器良玉不協長沙袁州俱陷仍推繼咸代之甫抵鎮京師陷福王立南都繼咸入朝密奏曰左良玉雖無異圖然所部多降將羣心危疑臣當星馳回鎮許之俄陳致治守邦大計引宋高宗用黃潛善汪伯彥事語侵馬士英與之隙所奏悉停寢羣小不喜繼咸交口言與良玉倡和脅制朝廷會都下有僞太子之事良玉爭不得繼咸疏言太子真僞非臣所能懸揣真則望行良玉言僞則不妨從容審處多召東宮舊臣辨識以解中外之疑疏未達良玉已反初繼咸聞李自成兵敗南下命部將郝効忠等守九江而自統副

將援袁州已登舟聞良玉反復還九江良玉舟在北岸
貽書繼咸願握手一別九江士民泣請繼咸往紓一方
難繼咸會良玉於舟中良玉言及太子下獄事大哭次
日舟移南岸良玉袖出皇太子密諭劫諸將盟繼咸正
色曰密諭從何來良玉語塞色變良久乃約不破城駐
軍候旨繼咸歸集諸將城樓灑泣曰兵諫非正晉陽之
甲春秋惡之可同亂乎遂約拒守而効忠等已出與良
玉合兵入城殺掠繼咸出責良玉良玉已疾篤夜望見
城中火起大哭曰予負臨侯臨侯繼咸別號也嘔血數
升遂死其子夢庚祕不發喪諸將推爲帥急移舟東將
及湖口夢庚効忠降於

大清遂執繼咸北去至明年三月終不屈乃殺之

國朝賜諡忠毅

明史 勝朝
殉節諸臣錄

梁佳植宜春人崇禎舉人令餘姚體緩而口緘默及鞫

訟則屹然不可移錢穀久爲吏胥乾沒佳植至一洗積

弊民樂輸恐後

浙江
通志

彭永中分宜人官衡山教諭崇禎十六年獻賊陷城死

節

國朝入祀忠義祠

勝朝殉節
諸臣錄

張兆蘭字以綺分宜人性豪逸強記能文崇禎辛巳選

貢廷試唱名禮部諸生皆隄伏兆蘭獨長揖宗伯奇之

癸未冬憤獻賊陷袁僞署官屬集義旅誅僞知縣龍方

捷恢復邑城事覺爲所執死萬年橋上

國朝入祀忠義祠

人物志 勝朝
殉節諸臣錄

趙賡禹袁州人官太僕寺少卿奉桂王命謀去孫可望
事洩被殺

國朝賜諡烈愍

勝朝殉節諸臣錄

張自新分宜人崇禎閒任京山縣尉有賊盤踞羅漢嶺
自新統民兵往勦眾寡不敵竟爲賊傷死之

國朝入祀忠義祠

湖廣通志勝朝殉節諸臣錄

張問明字日章分宜人以明經任魏縣值寇鈔掠城下
單騎撫諭以治河著功督臣嘉其能署參永平軍戊寅

己卯閒大水丁亥奇荒煮粥施米全活甚眾司理王延

禔題其廬曰德門遺老

人物志謹案謝志以問明於丁亥施賑係順治四年事謂前

志入明末者誤第問明未仕二姓賑荒乃其居鄉時事
王延禔即袁州推官故以遺老稱之仍應入明代爲合

例史

劉映洙字崑懸宜春人才氣豪宕崇禎鄉舉後棄家學

浮屠誅茅瀏醴深山以終

白志

國朝

袁繼梓字勝之業泗子順治進士嘗從施愚山講學於

青原白鷺閒學有原本方謁選卒於京邸

府志

陳之龍字去亢宜春人明天啟鄉舉明敏英達有文武才任常德推官升乾州知州西安同知入

國朝歷任巡撫廬鳳淮楊後以疾歸

白志

楊嘉禎宜春人郡庠生順治丙戌春父文盛避兵山堂

兵將至嘉禎從閒道渡水報父水急被溺旣入深處猶

躍水呼父速走竟溺死

白志

張自烈字爾公宜春人諸生博物洽聞與袁忠毅繼咸

爲友繼咸爲山西學臣遭誣獲罪山西諸生傅山爲之
伏闕訟冤自烈亦上書述繼咸生平本末以明繼咸無
自污法後繼咸督師江上招自烈爲助自烈作書謝之
終不赴鼎革後守志逾篤晚居廬山年七十七卒無嗣
南康太守廖文英葬之白鹿洞山外之鄭家冲安志府志
張自勳字不競宜春人諸生與兄自烈自熙並有名自
勳端方孝友重然諾慎取予博極羣書爲文獨出機杼
自成一家言少年潛心理學以求放心爲本數與宣城
施閏章講學昌黎鷺洲書院推服無閒府志
辛映斗字鼎卿萬載人嘗作吏順治間右布政莊應會
僉事安世鼎入覲映斗從往值

世祖垂詢江西利弊應會世鼎習聞袁瑞浮糧積弊映斗又嘗

陳兩郡百姓重困狀遂據以入告得減銀萬七千有奇
前明三百年苛政一旦革除自映斗一言啟之也映斗
後裔多貴仕稱萬載鉅族

府志

嚴開昶字遠侯分宜人康熙進士選知河南滎澤縣事
行取戶部主事厯官江南道監察御史時甘陝告災開
昶上疏請截漕二十萬備荒以母喪歸起復補浙江道
監察御史協理河南道事上三疏曰變銅觔采辦罷商
賈馬匹減蘇松浮糧允行者二惟浮糧格吏議吳人感
之與前明周忱況鍾稱江西三君子

府志

嚴宗嘉字二猷分宜人康熙鄉舉官湖北知縣厯權穀
城咸甯復攝沔陽州知州調直隸高陽縣築橋豬龍河
民悅之呼嚴公橋調玉田玉田當薊州下流上接運河

舊有丈二窩堵禦諸水薊州民告監司請毀窩紓薊害
監司是其議宗嘉曰是將以玉田爲壑也力持不可所
部民皆德之刻石記其事尋遷薊州牧改延慶調開州
州連河南界乾隆辛未河決陽武閤州受水者五百餘
邨宗嘉力拯救全活無算弟宗喆字學聖雍正進士改
吏部文選司主事累官湖南衡州知府衡屬龍旺山舊
產鉛奸民射利請於上官許開采聚眾洶洶宗喆見事
急馳往封禁仍請劾上官趨之旋以失察屬吏左遷江
甯江防同知李弟宗璧雍正鄉舉四川長壽知縣治白
蓮教案蔓引煩滋多所矜釋會大金川用兵宗璧躬役
輓運臥疾熱龍關提督岳鍾琪慰遣還宗璧不反顧卒

死關外

府志
縣志

劉瑞貞字綸五萍鄉人康熙十三年吳三桂叛僞將夏國相踞萍鄉境與棚寇合知瑞貞名脅之不應亂定縣令尙崇年以瑞貞家稍裕抑使爲吏沿其先贅姓戶爲易吉祥責按額徵米運江甯倉萍鄉南糧仍明舊民困重斂瑞貞力言兵後戶多逃亡催科無出崇年不許督益急乃棄家入金盆山崇年收其妻子及瑞貞至予杖幾絕崇年驚救之復泣告民困崇年悟始上言請改舊額一石折銀四錢三分留充軍餉民賴以安而瑞貞家毀矣子易瓚易琯易慧皆諸生孫經濟始請於督學沈翼機復姓劉氏五世孫鳳誥自有傳

府志 孫王庭
劉善人墓記

湯之相字尹叔宜春人諸生精易理工詩古文甲寅寇變與弟之傳俱爲賊執賊索之相金已得卽釋之相復

索之傳金之傳無金賊將殺之之相謂弟未娶無後某

已有子願以己金贖弟某就死賊義而兩釋之

府志

李元敏字道兼萍鄉人增貢生官南昌訓導先是寇作元敏扶父母匿山中母以病歿哀毀甚至會寇至執其父將殺之元敏號泣呼賊曰殺吾父盡殺我寇叱之曰汝受吾刃吾釋汝父元敏延頸受之刃中額血流被踵仍以身庇父寇曰此孝子也釋之去

府志

辛汝獻字古才萬載人雍正拔貢生湖口縣教諭湖口學宮崇聖祠在樞星門外汝獻以爲非制上議更建教士以德感諸生有兄弟爭產母暱幼子而謂長子不孝汝獻慨然曰人倫不明一至於此豈非儒者責乎剴切訓示皆感泣去汝獻少失怙恃賴大母劉繼母高撫育

成立比長盡孝養每食具甘旨而以草具自供習以爲常從弟某貧無以婚小宗幾絕汝獻爲之娶者再從父老無子汝獻事之如父年七十一卒以孫從益貴贈資

政大夫

府志
縣志

袁芳松字友鶴宜春人雍正鄉舉由內閣中書歷官大理寺卿筮仕京師五十餘年半居西曹治獄廉平器度

渾厚

府志

歐陽瑾字予石分宜人雍正進士授兵部主事先是郵傳支給兵曹郎以減損常例爲能瑾謂覈核太過州縣不堪民有受其害者不肯署坐是鐫級京師大通橋官運於東便門外舍舟而陸舊設車戶三十六資轉運官吏多巧取車戶負官逋盈萬瑾督役一年立法拯濟釋

宿逋至三千金既遷刑曹詳審律法駁正定讞積久勒
爲書曰欽恤成案擢御史督學奉天旋攝順天府尹覈
正宗學風骨凜然時征金川調兵東三省京師軍事旁
午瑾處之裕如具有條理累官戶部左侍郎聖誤罷歸
起內閣學士致仕

府志

林有席字儒珍分宜人乾隆進士官東湖知縣以經術
決獄無留牘尤嚴義利之辨士民和樂爲樹政通人和
綽楔以母喪歸復以在官日誥誤干吏議遂不出治親
喪一準朱軾儀禮節略哀禮並至家無餘資仍爲諸生
授經以著述自娛晚歲喪明正定文字耳聽口述無有
失誤年九十有一卒

府志

李榮陞字奠基萬載人乾隆進士幼有異資甫授句讀

卽疑鄭康成亂易篇次欲改以復費氏之舊讀詩至無
將大車以塵垢非韻疑疵爲瘖字之誤旣而謁選授湖
南永興知縣絕苞苴勤判決豪猾屏迹一時稱治以母
喪歸起官雲南權知雲州嘗奉檄出勘普洱大理府事
陟蒼山游洱海訪六詔遺蹟謁蒙氏鐘銘而還又權知
恩樂縣恩樂介哀牢蒙樂兩山之閒爲唐虞時崇山地
雍正時始改歸流榮陞治之化行徼外補官呈貢知縣
量調嵎峨年已六十有六以疾乞休上官知其貧延主
大理書院期年始辦裝歸榮陞遼於學精甘石家言嘗
推步五星謂於嘉慶五年三月十八日當聚奎分後果

驗

府志
縣志

顏培天字念純萍鄉人乾隆進士改庶吉士授戶部主

事出知階州回逆變起備禦如法民獲安堵

高宗幸直隸以勤敏受

上知賜貂緞除所罰俸上官多其才欲羅致之培天故骨鯁不能從卒望吏議旋起官宣化同知邑令有刑斃部民者培天承檄往治賄之不可卒直其冤民皆頌之復緣事被議得

旨內用以主事擢郎中任坐糧廳辛酉充河南正考官補監察

御史母老告歸卒

府志

鍾定邦字甯莊分宜人肆力經史工古文鴻臚袁芳松學士饒學曙咸致推敬乾隆進士兵部主事服官勤能尚書周璜深相引重每謂此座終當屬之乙未禮闈分校偶於同官所見遺卷謂是陳子龍張江一流力與薦

剡榜發爲新城黃嵩齡固知名士黃造門謝定邦拒之
曰吾拔士以公何以謝爲嵩齡卒成循吏人兩美之定

邦歷郎署二十年卒

府志
縣志

陳池鳳字鳴瑞萬載人乾隆進士少失怙家貧事祖母
與母稱孝日授徒於外夜輒歸省展衾褥驅蠹必親
爲之乃安旣成進士官山東泗水知縣德意藹如不事
鞭扑與父老語諄諄如家人民盡樂之會川楚教匪作
亂徵調紛然兵過橫掠嗟怨盈野池鳳馳書告其將領
且言泗水失安必不以一身輕萬民之命將領得書謝
過入境肅然官泗水五年累吏議去衣不盈笥益無宿
糧郡守稔其賢聘爲東魯院長越二年卒泗民爭賻之
始以柩歸

府志

辛從益字謙受萬載人乾隆進士改庶吉士授編修典試福建遷江南道御史以親老歸喪終累官兵科給事中上疏論大學士勒保長蘆法碼弊發未能引避東撫同興延閣賊報坐昧事幾居諫垣三年先後奏申明囤積詳慎甄別收養幼稚釐正文體及酒賈剝蝕運丁部吏婪索餉官諸疏詞旨侃侃凜然古直臣風節

仁宗鑒其忠朝奏夕可雖

明旨已行猶屈已從之擢光祿少卿

召對詢民間邪教從益奏正教昌明邪術自息方今有司不事講求吏治唯汲汲較量任所肥瘠已則牟利何以訓民欲正人心宜自責成司牧始

上韙其言通行訓誡道光初元累擢禮部侍郎渭南民柳全璧

挾富殺仇獄以賄免轉相牽制死者纍纍從盜馳驛往鞠罪人斯得貪墨伏辜事聞

袁諭江西撫臣毓岱疏請官理穀當從益言其弊爲富民貧民害者各二事遂止先後視學山東江蘇校士極嚴而愛護甚至去江蘇日諸生遮道送行從益勉以自愛有感泣不止者轉吏部右侍郎卒江陰華陰士民爲位以祀從益天性孝友父老病廢廁牕中褻親自浣濯少從仲兄問字終身師事之

府志

蕭光浩字志宏萍鄉人乾隆進士改戶部主事以知州揀發陝西甘肅會隴州民以徭役故滋變城門盡閉大吏檄光浩率兵往光浩曰亂未成而兵往是速之變也單騎至呼門入撫定之旋權隴州高馬諸賊起練鄉兵

禦之得功加藍翎內擢員外郎再出爲直隸廣平府知

府卒於官

府志

劉鳳誥字承牧一字金門萍鄉人乾隆己酉一甲三名
進士授編修壬子視學廣西嘉慶己未充

高宗實錄總纂官庚申典湖北鄉試辛酉典山東鄉試留任學
政再充實錄館副總裁與纂

國史官史續編累擢兵部左侍郎加太子少保銜再出典
江南鄉試旋視學浙江取士重經術一屏空疏陋習戊
辰鄉試監臨以失察獲譴發黑龍江效力癸酉起編修
得目疾乞歸卒鳳誥嗜古博聞文才澹雅自入詞館卽
典領著作累有譴謫輒邀

恩宥儒生稽古之榮世罕其比

府志
縣志

萬上遴字殿卿分宜人乾隆拔貢生性耿介雅操拔俗
工書畫有能名寸縑尺幅人知寶貴生平嗜王摩詰詩
所作致有雅韻子孚諸生以畫世其家

府志

楊曰鯤字滄石分宜人乾隆進士刑部員外郎精於法
家言薦舉充律例館提調官升郎中書成其所爲條例
案語別勒爲書嘉慶丁卯典試四川

仁宗知其名嘗以語河南臬司陳若霖旋授襄陽府知府民素
健訟積牘百餘未就理曰鯤下車一月而畢案無留牘
民頌神明歷二年卒於官曰鯤幼貧未能就傅母吳氏
授之讀早歲有文譽性嗜學手不釋卷嘗訂正古尺研
辨韻學有心得於天下山川郡縣險易古今河道尤切

講貫

府志

張埇春字嗣昌萍鄉人乾隆鄉舉歷官廣西平樂賀博
白蒼梧知縣擢知廣東廉州府廉界安南國爲盜淵藪
埇春嚴邊備卒無警廉江故急悍行旅患之埇春疏改
故道十五里世以爲便權南韶連道海盜卒發率兵抵
九頭山禽其渠調韶州府題升雷瓊道以勞致疾卒年
七十四

府志

鄧觀灝萍鄉人父錫禮乾隆進士累官河南驛鹽糧道
擢四川按察使被逮下獄籍沒論死遇矜緩淹繫觀灝
隻身走齊鄭燕趙閒乞貸爲父納贖貲集苦不得達乃
闌入禁地訴於步軍統領阿里袞呵叱曰爾不畏死邪
繫諸暗室觀灝痛哭將自殞一守弁聞而義之竟釋焉
它日大學士傅恆與阿里袞並馬出觀灝復泣訴馬前

傳語曰稚子冒譴救親難能也宜上請阿亦惻然取其

辭入奏得免侍郎劉鳳誥爲之傳

府志
縣志

楊眉字蘇門萬載人郡諸生幼聰敏工詩詞三試不售
絕意進取養母訓弟輒怡然自得弟旣長亦爲高才生
相與承歡惟恐不及食指百餘咸就眉約有煩苦事不
得傳述損老人歡兄弟自外入必袖甘旨遺母或張鐙
設宴以爲娛樂邑中稱孝友者必推楊氏

府志

辛紹業字服先萬載人嘉慶進士博研羣書少與浮梁
鄧傳安齊名督學翁方綱號知人最器賞之有萬載浮
梁辛與鄧說經專席驚羣英之句旣通籍官國子助教
居京師十四年日與方綱論說經傳旁及說文金石方
綱每得一義必往復商榷以決其信爲文胎息韓柳詩

宗少陵以疾卒南學署方綱復哭之以詩有云老屋青
鐙淚誰能贖敬之其痛之如此子僕字士勉嘉慶鄉舉
通經習算法精小學著述盈尺張文毅芾爲定春秋內
外傳類文疏義一書价拔貢生仍廩生孫斌道光中鄉
試第一有功副榜貢生黠大受諸生

府志

郭大經字緯之萬載人嘉慶進士官安徽太和知縣邑
新改繁號難治大經力除民害無寬縱河南盜渠蔣魁
偕其黨潛入境捕治之自是奸宄屏迹治成進諸生講
學士知自愛絕迹訟庭嘗疏濬白洋湖污下之地多成
沃壤民上神明父母之頌一爲鄉闈同考得士八人皆
江南名宿以母喪去官士民傾城走送或遠至潁上霍
邱而返喪終改官任南康教授倡濬蓼花池水口歲登

穀數十萬石又嘗修宋儒劉凝之墓甘烈女墳監鹿洞書院爲諸生乞增膏火盡儒官所當爲年七十九卒

府志

志

縣

辛炳喬字朝嶽萬載人幼通經史著述繁夥初居南浦坊不妄交游與同邑李榮陞分宜林有席金谿王謨數人商推今古郵筒贈答而已繼厭城市於城南五里闕最秀園著書自娛晚年貢成均客藩邸卒

府志

辛炳晟字融初萬載人嘉慶進士幼有神童之目見李進士行卷卽能抉其引用榮澤之訛長益邃於學文筆淵懿人謂如周鼎商彝不可褻視尤工書得唐人用筆三昧好事者爲集藤石齋墨刻晚官撫州教授

府志
縣志

湯譽光原名調元字子變萬載人嘉慶鄉舉大挑知縣

聞母喪哀毀骨立亟奔歸卒於道

府志

胡光瑩字畫谿宜春人道光進士授刑部主事累官福甯汀州知府時粵賊陷浙江浙與閩界兵事孔亟光瑩獲賊諜廉知將犯福甯檄各縣兵守隘賊至數擊退擢糧儲道攝興泉永兵備道

府志

喻增高字鳳岡萍鄉人初以選拔貢生官豐城訓導邑諸生某以事觸令怒移檄褫衿增高悉其誣持不可令懇郡守增高力救之道光進士改庶吉士授編修丁酉典湖南鄉試江忠源出其門累官左庶子

府志

江西通志卷一百四十二